

"Niha chatohanai ne, raotojoein itarai rucuecuruha ne jaannu", nain aitiin laeneratecure La Asamblea de las Naciones Unidas canaacaanu que, cana temurau nenacauru-cocoinanacaihuri 10 janoniha disiembre ne bana, 1973 ajaanaa ne bana. Nitohanein ichacuruhane baihate aitoroatecure cana temurau nenacauru-cocoinanacaihuri itolere sacutaain escoela cuhane ereretaain beebejeuruha satiin nerelanacauru leiijiin inejeein cautelanaalane coina.

SATIIN CAA CHAURUATANE QUE NENACAAURU CACHAAURU RAI RAUHI

Nunue

Satiin, cachaauru raite ne rauhi. Nii jaun, nainihe chaque ereein nihacane jaannu, jiniiquiin, raotojoein, ita cailichanaa coauquelanaala, rauhij iriin nena j erichaache ne. Nitohanai coitucuhin neniha cachaauruna jaunte, ita cailichairiin nihane, ichaoore cachaauru. Nii jaunna, neruujih saain, itolere cachauru ne jerichaanu; itolere raotojoein ichaohin aúihanein, niicha esenetai esenetaain, niicha coacui que ereerejeein, naojoaain niha cachaauru ne jerichaanu.

Saain acaauru cachaauru coroatajanemii, saain itolere gobiernooru, nabana aiha nejerateein, naojoaain niha rai cachaauru ne coataa.

Caohachaaain ita coaraain, naojoaain neeuruhine leeocho gobierno aina itolere caa chauruatane sacutaain nenacauru gobiernooru.

"Caohatoha naain jeriha laurilaurichuru nenacauru gobierno, caa canaacaanu aitoojoan que na jaun, uain caohachaaain cachaauru coroataj anecurumii te, caoachaaain neruujueein neeuruhine.

"Caohatoha carai," naain ereeuri gobiernooru, esiahen rauhijiriin, caa aitocooanu ne rijijieein tonoraain ichacurumiite raotojoein jianacoo nena nainecurumii, saain rai cachaauru.

Nii jaun te, caohachae saain itolere neein coitucuruha saain cachaauru ne caohachae, rauhij iriin ichacuruhane coina.

CARITIIN TE AITUCURE LAURILAURICHURU CAJE UNACAURO CURAANAACURU ITA TAOJIAIN

Nii jaun, itolere sacutaain cachaauru relauruhinete, coitucuhin, "Naojoaain te chuisi ne cana rai rauhi," naain cotucuruha cachaauru laurilaurichuru nenacauru. Nitohaneinte, jeraaen cuujuein nitohaniha cureein.

Artículo 1.

Ita rijicha itolere cache. Aihana jaun, ita belaaain, naojoain neeuruhine laurilaurichuru nenacauru aina itolere cachaauru.

Artículo 2.

Satiin cachauru raite ne, jericha nejeein acaauru rai rauhi, ita jelon cuhin. Nii jaun, nihei chatohanein, jichojoai, bacauha, ijaen, jorio, batirichuru, coriqui neba, cailichai cache, cocoamo, shipibo, acoarona, saain niichuru te jericha nejeein ne, acauru rai rauhi.

Artículo 3.

Aihana jaunte ne, satiin cachaauru rai rahui, raotojoein rohecaeraelanaala, jerihane tocohaneein ichaoha cache ne coina.

Articulo 4.

Aihana jaun, nijiaonriha atebihaen rai cha que erenaa rijitiin, namute cache letoain niha cachaaurune.

Articulo 5.

Jiaonriha chunei cache cunaitain, naojoain neeuha cocoaainacaihurine.

Articulo 6.

Cha rijijiein tein ti neseu nenacaauru que suujua acatein caohachaa in raaure. Nii rijijiein chu joanreein nirljleln nenacaauru cachaaurununa cocoaicha naojoain que suujua acatein caohachaa in coaraain naojoain neeuruhine cocoaainacaihuri.

Articulo 7.

Joaenreein cache, niha acaauru rai chatohanai ine, cocoaainacaihuri rai ereeuruhinete, acaauru coroatajanemii cocoaainacaihuri te aitoa caa rauhi ne riJlJleln neine cachaauru rai rauhi.

Articulo 8.

Rauhijiriin caa erenaa tonoraain ichacureniha cocoaainacaihurine acaaru curaanaa rai beeuruhine cachaaaurute, rucuecuruhine acaauru aina acaauru curaanaa.

Articulo 9.

Jiaonriha, atiin joanreein leera colane cache mucuhin caresero cuhane tein, naojoain neeuha cocoaainacaihurine. Chaen chu, coa nii natane caje sitaaln, leecha ataneu letoauruha cocoaainacaihuri, joanreein leera colane.

Articulo 10.

Satiin cachauro raite ne rauhi, casetecaa cocoaainacaihurine ajiiniha ereein naojoaunruha en coina. Baaso ichaa in, chatohanein cache basijiauhin naojoaain neeuha cocoaainacaihurine leecha cocoaainacai, n ii cocoaainacai arai nihei, que rucuerateeuruhine cachaauru. Chaen chu chatohanein cocoaainacaihuri rai chatohanein ichaa in asijiauhin, naojoaain niha cache ne, jericha nejeein leecha cocoaainacai, nii cache arai nihei cocoaainacai que rucuerateeuruhine. Chaen nii neruujue bana, aonaa ne coina turuha cache ne, jiaonriha sitaain, naojoaain niha cocoaainacai te neruujia nii ine aonaain, neeuruhine cachaauru.

Articulo 11.

Caohachaa i, rucujelanaala cache casetecaa in niha cocoaainacai ine. Caohachaa in coitucuhin, "Esihaen te chuhisi, baaso ichae," naain caohachaa in coitucuera lanaala joanreein cache casetecaa in niha cocoaainacaine caohachaa i.

Jiaonriha jaiti cocoaerae nihane jana chatohanai ichaa cache ne mucuhin neeuruha cocoainanacaihurine.

Articulo 12.

Satiin cachauru coaramii cocoainanacaihuri. Nabana leijiiin cache nenajau turuhin roecanaa coacuhin ninahuene. Aca te naojoaain, n e chu aansaaineein ne, "naain joenreein que ereein ita roecanaa coacuhin naojoaain neeuruhane, nabana cocoainanacaihuri netonai nii esenetaain, cache roecanaa coacuruha ne coataa. Jiaonriha chu chaen, leijiiin cache rai, letono quiricha raain, coaraain naojoaunruha nejelaauru ne.

Articulo 13.

Niha rauhi, satiin cache rai, chunijiu ichaonaa jerihana jaun ichaoha ne coina.

Chaente chu ne, satiin cachaauru rai rauhi, chunijiu atane cuhin ichaonaa jeriha ne ichaoha cuuruha ne coina. Chaen te chu ne, acaauru rai rauhi, jeliha natane caunaa jerecuruha ne, caauruha ne coina.

Articulo 14.

Niha rauhi, niha roecaera natane ne, chunijiu nejelau atane cuin raotojoein ichaauruha cachaauru ne jaan nu.

Jana, chatohanein soserena neein, asijiauto neein, naojoaain niha cache ne, nihei rai rauhi, nejelau atane cuhin soroha ne coina.

Articulo 15.

Satiin cache rai te ne rauhi, nataneu-nenacaauru laurijira niha ne baiha nejelau atane nenacaauru laurijira niha cuha cache ne.

Niichuru jericha nejeein nataneu caoachaain coaracuruha naraichuru ne rijijiein caoachaain coaracurumii nejelau atane nenacaauru.

Articulo 16.

Niha rauhi, ita rijijiein ichauhena neeuruhane, ene aina ita raain naojoaunruha cachaauru ne jaan nu. Jericha nejeeinte quicha rai niha rauhi ne rijijiein, ne, enecuru rai rauhi. Coa chu chaen, chatohanein bacauha, cocoamo, ijiaen, naojoaainejeein ranaa jeriha joenreein, ene, quicha, naojoaaine, coa caohateuruha.

Aca jeria ne jana, jereniha nii ene ne jana, raa cache ne, caohachaa.

Ene raain niha quicha ne, coaracurumiin cocoainanacaihuri; nabana charijieinejeein ita que nererojoecaain ita jianecuruha ne coataa.

Articulo 17.

Satiin cachauru rai te ne rauhi, rai rucuheleeuru, rai atane, naojoaain erora neein niha ne coina.

Chaen chu, joenreein coreniha rai rucuheleeuru, rai atane, naojoaain caje sitaanaa nainihei cache, nihei cocoainanacaihuri niha natiin.

Articulo 18.

Niha satiin cachauru rai rauhi, Cana Coaunera ere esenetaain tonorana jeriha ne, tonoraauruha jianacoo neein cha que tonajelanaala ne coina.

Articulo 19.

Niha chu chaen rauhi cachaauru rai, niicha coacui, cachauru rai beein, naajoaunruha ne coina. Nainiheii nii coreniaa acaauru mucuhin niha cocoainanacaihuri ne.

Articulo 20.

Niha chu chaen, cachaauru rai rauni ita taojiaain chaelai que ereereena jerecuruha ne, ichacuruha chaelai que tonajelanaalane coina.

Niha chu chaen, cachaauru rai rauhi, ita taojieraauru aina nenea jereniha ne, cuheniha ne coina.

Articulo 21.

Niha chu chaen, cachaauru rai rauhi, necoriha cocoainanacaine jerecuruha ne, "Aca aca nemii", naain leiijiin coaraain aca jeriha cachaauru ne aca cocoainanacainein neme.

Niha cachaauru rai rauhi, "Aca aca nemii," naain ereeuruha saain cachaauru ne coina.

[Missing?]

Articulo 22.

Niha satiin cachaauru rai rauhi, roeroecaerae lanaala, raotojoein neeuruha cachaauru ne coina. Niha acaauru roeroecaera ne, acaauru coroatajaneine acaauru gobierno.

Articulo 23.

Niha chu rauhi amihaniha cachaauru ne coina. Niicha rautaai amihanenaa coaraain que amihaneeeuruha cachaauru ne coina. Niicha rautaai amihanenaa coaraain que amihaneeeuruha cachaauru ne coma.

Chaen chu, ita rijijiein amiania cache ne, ita rijijiein core raauruha ne te, caohachae.

Raujiaain caohachajeein canaauruhine amihanenacaaurute, raotojoein sinij iera aina jiniiquiin, bereecuru aina raotojoein ichaooruhine chacaauru.

Niha chu cachaauru rai rauhi, niha chatohanai, ne, ita taojiaain jiniiquiin fatoroon aina rucuhecuruha ne coina.

Articulo 24.

Niha chu rauhi, le janonaa cuhane nesuruhin basijijin nebetacaain naajoaain neeuruha cachaauru en jaan nu. Niha chu cachaauru rai rauhi carajaain amihaneeeuruha ne, acaauru rai nebetacanaa tiha fatoroon core aina ne coina.

Articulo 25.

Niha chu chaen rauhi, biinaa, camotojoe, canaanaihuru, cunaitenacaauru, naaojoaihunri coroatajaniha gobierno ne coina. Nabana escoela que lanaain, nabana itolere que lanaain neeuruha itolere cachaauru ne coataa.

Chaen chu, leeochoaauru coroatajaniha ne amuritoheriin, jelai neein canaanai siirichaauru enecuru coroatajaneene, nii beree aina curuaeccaain gobierno. Chaen chu ujuateje rijijiein, nenacaauru canaanaihuru coroatajaneene gobierno.

Articulo 26.

Niha satiin cachaauru rai rauhi, core colane nirijiein nerelaain naaojoaain, quiricha inain naaojoaain niha cache ne coina.

Chaen escoela cuhane nerelaauruhine itolere que, raotojoein j iniiquiiin, ichaonaa nijianai que, nerelaauruhine te, joenreein bacauha aina nia natiin, raotojoein ichaauruhine.

Niha rauhi, bereecuru rai, niicha rautai escoela coaraain, cuu bereecuru tein naaojoaain niha inacaauru ne jaan nu.

Articulo 27.

Niha chu chaen, cachauru rai rauhi, niha besta ne, niha chatohanaine, ita taojiaain, naaojoaain neeuruha cachauru ne, cunaa jerei cuhin, naaojoaan ne coina.

Niha rauhi, cachaauru rai, chatohanai niicha coitucui ichaain que necoreteen core raa cachaauru ne coma.

Articulo 28.

Satiin cachaauru rai te ne rauhi, esihaen raujiriin caa rauhi cuhane aitoa ne rijijiein.

Articulo 29.

Chaen chu, ita coroatajaneauruhine cachaauru, ita acatiha tacaain.

Nihe, chunei cache rai rauhi, leeocho cache rai rauhi que nererojoeccaain niha cache ne jaan nu.

Chaen chu, nainihe caa icharaauru aina nererojoeccaain niha cachaauru ne jaan nu.

Articulo 30.

Nainihe chu, chunei gobierno, atane curuanaa, naaojoaain niha natiin, caa rauhi ichara nichaanu ne aina nererojoeccaain neeuruha ne jaan nu.